

Kiko ta e Bèrdat?

2 Timoteo 4:3-4 ta bisa: Pasobra e tempu lo bin ku hende lo no **aseptá**, **soportá** doktrina **sano** mas i **instrukshon presis** ku lo reta nan ku e **Bèrdat di Dios**; ma al kontrario, pa satisfasé **nan mes mal deseonan**, nan lo akumulá pa nan mes hopi **siñansanan** pa satisfasé **nan mes mal deseonan** i **sostené nan eror nan** i bisa nan loke nan orea ku ta **kishikí kièr tende**, i lo bira nan orea for di e **Bèrdat**, i lo bolbe na **fábula** i loke hende a traha, i **montoná maestro** ku ta papia pa **karisiá** nan orea i **aseptá** loke ta **inaseptabel**.

Kiko ta e Bèrdat?

1. Abo por ta **ignorante** di e **Bèrdat**.
2. Abo por tin **enseñansa eróneo** strobando di eksperensiá e **Bèrdat**.
3. Abo su **kurason** òf **mente** por ta kitando bo for di e **Bèrdat**.

1. Abo por ta **ignorante** di e **Bèrdat**.

Ignoransia kièr-men òf mihó bisa e palabra rais (Hebreo) di **ignorante** ta **peka**. **Peka dor di fayo, peka involuntario, peka dor di eror, faya ku Dios, peka inkonsientemente**. **Den 1 Juan 3:4 tin skirbí:** Ken ku praktiká, sigui den **piká** ta promové anarkia, ta praktiká **kibramentu** di **Lei** tambe, pasobra **piká** ta **rebeldia** kontra **Dios** i **piká** ta **kibramentu** di **Lei** di **Dios**, esaki dor ku nan no tin limitashon òf ta wòrdu regulá dor di **Su Lei** i **Su Deseonan**.

2. Abo por tin **enseñansa eróneo** strobando di eksperensiá e **Bèrdat**.

Hesus, Esun Ungi no a bini i bisa pa nos kuminsá ku Kristianismo. Hopi di e konfushon ta bini dor di loke **Sha'ul** a skirbi. **Sha'ul** ta e persona ku tur Kristian konosé komo **Pablo**. **Sha'ul** a skirbi 13 di e bukinan di Tèstament Nobo i ta un **Hudiu**. **Efesianan 3:1 ta bisa:** Pa esei ami, **Pablo**, ta resa pa boso, ami ku ta prizonero pasobra mi ta sirbidó di **Kristu-Hesus** i na benefisio di boso **paganonan**; ku no ta **Hudiu**.

Kiko ta un pagano? i di kon Sha'ul tin 2 nòmber? Den Hebreo un **pagano** ta un hende sin **Dios di Abraham, Isaak i Jakòb, Dios di Israel**. **Sha'ul** tabata tin 2 nòmber pasobra e tempu ei bo mester tabatin 2 nòmber den reino Romano. Su nòmber **Hudiu**; **Sha'ul**, ku su mama a dunele i un nòmber Romano; **Pablo**.

Ta di e reino Romano Kristianismo a bini, kuminsando ku Katólikonan Romano. Dor ku e Romanonan no tabata **Hudiu** i no tabata interesá pa **siña** algu, keriendo ku nan sa tur kos, asina **ignorante** di e **Bèrdat**, nan a pèrdè e **enseñansa** di **Dios Tata Su Deseonan** ku ta pa traha i tin **Un Hende Nobo** di e **Hudiu** i esun ku **no ta Hudiu**. Den **Efesianan 2:15-16 tin skirbi:** Dor di abolí den **Su karni** e **enemistat**, kual ta e **lei di mandamentunan** kontené den e **ordenansanan di saserdotenan**, (**fariseonan i saduseonan**), pa den **Su mes E** hasi nan dos (**Hudiu i no Hudiu**) bira **Un Hende Nobo**, asina establesiendo **pas** i pa **rekonsiliá** nan dos (**Hudiu i no Hudiu**) den **un solo kurpa** ku **Dios** dor di e krus, matando e **enemistat** pa medio di **Dje**.

3. Abo su kurason òf mente por ta kitando bo for di e Bèrdat.

Si abo kièr **siña** sa **Su Deseonan** dor di **Su enseñansa**, ta posibel, pero bo **kurason** òf bo **mente** Kristian por ta kitando abo for di e **Bèrdat**. **Pablo, Sha'ul** a skirbi 13 di e bukinan di Tèstamènt Nobo i ta un **Hudiu**. E sobra 14 bukinan di Tèstamènt Nobo tambe a wòrdu skirbi dor di hòmbèrnan **Hudiu**. Tur e 4 Evangelionan ta **Hudiu**, henter e Tèstamènt Nobo ta **Hudiu**, ku a bini di **Hebreo**. Es-desir ora un hende **kombertí**, e ta **kombertí** i bira un **Hudiu**, pasobra e **Evangelio, Enseñansa** ta **Hudiu**. For di den Tèstamènt Bieu hende tabata **kombertí** i e **pagano** tabata **kombertí** i bin bira parti di e **Reino di Dios di Israel**. **Efesioanan 4:4-6 ta bisa**: Tin **un kurpa** di kreyente i **un Spiritu**, meskos ku boso (**pagano**) tambe a wòrdu yamá den **un speransa** di boso yamada; **un Señor, un fe, un boutismo, un Dios i Tata** di tur, Kende ta **Soberano** riba tur i **trahando dor di tur i biba-bandó den tur**.

Den Mateo 7:21-23 tin skirbi:

No ta **tur hende** ku bisa **Mi**: “**Señor, Señor,**” lo drenta reino di shelu, ma esun ku kumpli ku **boluntad** di **Mi Tata den shelu**. Hopi lo bisa **Mi** den e dia ei: '**Señor, Señor,** nos no a **profetisá den Bo nòmber**, i **den Bo nòmber a saka demoño**, i **den Bo nòmber a hasi hopi milager?**' Anto e ora ei lo **Mi** deklará públikamente na nan: “**Nunka Mi no a konosé boso!** Bai for di **Mi, malechornan.**”

Ta ken nos Redentor, Yeshua, Esun Ungi a duna poder, forza, sabiduria i gracia pa profetisá den Su nòmber?

Ta ken nos Salvador, Yeshua, Mesias a duna poder, forza, sabiduria i gracia pa den Su nòmber saka demoño?

Ta ken nos Bèrdat, Yeshua, Hamashiach a duna poder, forza, sabiduria i gracia pa den Su nòmber hasi hopi milager?

22 Juli 2016

Sea Bendishoná den e Amor di Yeshua Mesias
Rev. Remsly L Riley